

景明刻本兩京遺編

南京通志

賈子序

賈子者賈誼新書也奚稱賈子子之也賈子
賈子作乎類賈子之言者作也漢興誼文最
高古然誼陳說治理善據事實識要奧一
可措之行蓋管宴之儔焉故曰誼練達國體
云誼文高古最者太史公業裁之入史記矣
後人或撫其創草及他篇簡論說不忍遂捐
棄於是類之稱書焉如過秦論太史公業裁
入之矣褚先生又取其餘附之後今為三篇

云亦有一事一義而篇二三者或二篇而雜之一如治安策攙截無復緒理可尋乃其宏識巨議故皎皎如日星如江河地中不得掩沒之矣此書宋淳熙間嘗刻潭州淳祐間又刊脩焉時已稱舛缺及刻本失士夫家轉抄一切出吏手吏苦其煩也輒任減落其字句久之眩惑踰行竄其字句重複訛之士夫者又靡之校也故其書愈舛缺不可讀弘治間都進士穆得此書於樂平喬公刻之京師已

復有翻刻者碩仍舛缺也予今刻則畧校之
矣然卒莫之質補之也麟甲鳳毛僅存見于
世者此耳幸邪悲邪賈子十卷共五十八篇
內亡其三篇明正德八年歲在癸酉冬十一
月北郡李夢陽撰寓白鹿洞書院

賈子序

終

賈子卷第一

過秦上中下

宗首

數寧

藩傷

藩彊

大都

等齊

過秦上

秦孝公據崤函之固擁雍州之地君臣固守以窺周室有席卷天下包舉宇內囊括四海之意并吞八荒之心當是時商君佐之內立法度務耕織脩守戰之備外連衡而闘諸侯

於是秦人拱手而取西河之外孝公既沒惠王武王蒙故業因遺策南取漢中西舉巴蜀東割膏腴之地北收要害之郡諸侯恐懼同盟而謀弱秦不愛珍器重寶肥饒之地以致天下之士合從締交相與為一當此時齊有孟嘗趙有平原楚有春申魏有信陵此四賢者皆明智而忠信寬厚而愛人尊賢重士約從離橫兼韓魏燕楚齊趙宋衛中山之衆於是六國之士有寧越徐尚蘇秦杜赫之屬為

之謀齊明周最陳軫昭滑樓緩翟景蘇厲樂毅之徒通其意吳起孫臏帶佗倪良王廖田忌廉頗趙奢之朋制其兵嘗以什倍之地百萬之師扣關而攻秦秦人開關延敵九國之師逡巡遁逃而不敢進秦無亡矢遺鏃之費而天下諸侯已困矣於是從散約解爭割地而賂秦秦有餘力而制其敝追亡逐北伏屍百萬流血漂櫓因利乘便宰割天下分裂山河疆國請服弱國入朝施及孝文王莊襄王

人賢子卷一
享國之曰淺國家無事及至始皇奮六世之
餘烈振長策而御宇內吞二周而亡諸侯履
至尊而制六合執敲朴而鞭笞天下威振四
海南取百越之地以為桂林象郡百越之君
俛首係頸委命下吏乃使蒙恬北築長城而
守藩籬却匈奴七百餘里胡人不敢南下而
牧馬士不敢彎弓而報怨於是廢先王之道
焚百家之言以愚黔首隳名城殺豪傑收天
下之兵聚之咸陽銷鋒鏑鑄以為金人十二

以弱天下之民然後踐華為城因河為池據
億丈之高臨不測之谿以為固良將勁弩而
守要害之處信臣精卒陳利兵而誰何天下
已定始皇之心自以為關中之固金城千里
子孫帝王萬世之業也始皇既沒餘威振於
殊俗然陳涉甕牖繩樞之子氓隸之人而遷
徙之徒也材能不及中庸非有仲尼墨翟之
賢陶朱猗頓之富躡足行伍之間而倔起阡
陌之中率罷散之卒將數百之衆轉而攻秦

斬木為兵揭竿為旗天下雲合而響應贏糧而景從山東豪俊遂並起而亡秦族矣且夫天下非小弱也雍州之地崤函之固自若也陳涉之位非尊於齊楚燕趙韓魏宋衛中山之君也鉏耰棘矜非銛於鈎戟長鎗也謫戍之衆非抗於九國之師也深謀遠慮行軍用兵之道非及鄉時之士也然而成敗異變功業相反何也試使山東之國與陳涉度長挈大比權量力則不可同年而語矣然秦以區

區之地致萬乘之勢序八州而朝同列百餘
年矣然後以六合為家崤函為宮一夫作難
而七廟隳身死人手為天下笑者何也仁義
不施攻守之勢異也

過秦中

秦滅周祀并海內兼諸侯南面稱帝以四海
養天下之士斐然嚮風若是何也曰近古之
無王者久矣周室卑微五霸既滅令不行於
天下是以諸侯力政強凌弱衆暴寡兵革不

休士民罷散今秦南面而王天下是上有天子也即元元之民冀安其性命莫不虛心而仰上當此之時專威定功安危之本在於此矣秦王懷貪鄙之心行自奮之智不信功臣不親士民廢王道而立私愛焚文書而酷刑法先詐力而後仁義以暴虐為天下始夫并兼者高詐力安危者貴順權此言取與守不同術也秦雖併戰國而王天下其道不易其政不改是其所以取之守之者異也孤獨而

有之故其亡可立而待借使秦王論上世之事並殷周之迹以制御其政後雖有淫驕之主猶未有傾危之患也故三王之建天下名號顯美功業長久今秦二世立天下莫不引領而觀其政夫寒者利裋褐而饑者甘糟糠天下磬磬新至之資也此言勞民之易為仁也嚮使二世有庸主之行而任忠賢臣主一心而憂海內之患縞素而正先帝之過裂地分民以封功臣之後建國立君以禮天下虛

圖圉而免刑戮去收孥污穢之罪使各反其鄉里發倉廩散財幣以賑孤獨窮困之士輕賦少事以佐百姓之急約法省刑以持其後使天下之人皆得自新更節循行各慎其身塞萬民之望而以盛德與天下天下息矣即四海之內皆歡然各自安樂其處唯恐有變雖有狡猾之民無離上之心則不軌之臣無以歸其智而暴亂之奸弭矣二世不行此術而重以無道壞宗廟與民更始作阿房之宮

繁刑嚴誅吏治刻深賞罰不當賦歛無度天下多事吏不能紀百姓困窮而主不收卹然後奸偽並起而上下相遁蒙罪者衆刑僂相望於道而天下苦之自君卿以下至於衆庶人懷自危之心親處窮苦之實咸不安其位故易動也是以陳涉不用湯武之賢不藉公侯之尊奮於大澤而天下響應者其民危也故先王者見始終之變知存亡之由是以牧民之道務在安之而已天下雖有逆行之臣

賈子卷一
必無響應之助矣故曰安民可與行義而危
民易與為非此之謂也貴為天子富有四海
身不免於戮者正傾非也是二世之過也

過秦下

秦兼諸侯山東三十餘郡修津關據嶮塞繕
甲兵而守之然陳涉率散亂之衆數百奮臂
大呼不用弓戟之兵鉏耰白挺望屋而食橫
行天下秦人阻嶮不守關梁不閉長戟不刺
彊弩不射楚師深入戰於鴻門曾無藩籬之